

**Dekretu Governu n. ° 21/2017,
de 12 Maio**

**REGULAMENTA ORGANIZASAUN NO FUNSIONAMENTU SENTRU
VOTASAUN NO PROSEDIMENTU VOTASAUN, KONTAJEN VOTU NO
APURAMENTU REZULTADU SIRA**

Realiza prinsípiu husi Estadu Direitu Demokrátiku nian, konsagra iha artigu 1º husi Konstituisaun Repúblika Demokrátika Timor-Leste ne'ebé ko'alia kona ba realiza eleisaun ida ne'ebé livre no justu ba órgaun soberania sira, hanesan Prezidente Repúblika no Parlamentu Nasional.

Realiza eleisaun Parlamentu Nasional nian halo tuir nórma jurídika sira hirak ne'ebé maka aprova ona husi Lei nº 6/2006, 28 Dezembru, ba redasaun ida ne'ebé maka aprova husi Lei nº 9/2017, 5 Maiu.

Kuadru Jurídiku no regulamentar ne'ebé maka vigora iha Repúblika Demokratika Timor-Leste hetan ona rekoñesimentu husi misaun observaun eleitorál bar-barak nudár di'ak duni atu bele asegura eleisaun ida ne'ebé maka livre no justu, ho esepisaun ba armonizasaun ida ne'ebé loloos ho Lei Eleitorál Parlamentu Nasional nian, ne'ebé foin lalais ne'e hetan ona aprovasaun. Regulamentu ida ne'ebé maka hetan aprovasaun husi Dekretu Governu ida ne'e la halo alterasaun makás ba organizasaun no funksionamentu Sentru Votasaun ka prosedimentu votasaun, kontajen votu sira no apuramentu ba rezultadu sira eleitorál.

Ho nune'e, eleitor sira kontinua ejerse sira ida-idak nia direitu votu iha sentru votasaun ne'ebé maka besik liu ba nia hela-fatin, basta maka sentru ne'e lokaliza duni iha Unidade Jeográfika ida ne'ebé maka eleitor ne'e inskritu ba iha resenseamentu eleitorál. Sentru Votasaun sira sei organiza iha estasaun votu, ho número ida ne'ebé maka varia tuir número eleitor sira ne'ebé maka iha ona lista eleitor iha Sentru Votasaun ida ne'e nian. Hodi kumpre Lei Eleitorál ba Parlamentu Nasional nian, estabelese mós katak tenke loke Sentru Votasaun iha kada Suku, no nia número mós bele boot liu tan, depende ba distánsia entre aldeia sira husi Suku ne'e ninian.

Operasaun eleitorál sei konduz husi ofisiál eleitorál sira ne'ebé rekruta no hetan ona formasaun husi Sekretáriadu Tékniku ba Administrasaun Eleitorál, nudár responsavel ba manutensaun disiplina iha Estasaun Votu no Sentru Votasaun sira nia laran, fó garantia seguransa, konfidensialidade no liberdade atu ejerse direitu votu husi sidadaun sira.

Nudár knar ofisiál eleitorál sira nian atu asegura realizaun aktu eleitorál iha prizaun no ospital sira, tenke ba duni too fatin sira ne'e atu bele rekolla votu sira husi sidadaun hirak ne'ebé maka lei impede hela atu vota no sira no liberdade ka mobilidade ne'e hetan limitasaun

Operasaun kontajen no apuramentu inisiál ba rezultadu eleitorál sira komesa kedas wainhira periodu votasaun nian remata ona, no sei halo iha nivel Sentru Votasaun nian. Operasaun apuramentu munisipál sei hala'ó iha Assembleia Apuramentu Munisipál no, iha Oe-Cusse Ambeno, sei hala'ó iha Assembleia Apuramentu Rejiaun Administrativa Espesiál nian. Órgaun apuramentu intermédiu ba rezultadu eleitorál sira hahú hala'ó sira nia servisu kuandu hetan

ona, nu mínimo, áta lima husi sentru votasaun sira. Operasaun apuramentu intermédiu ba rezultadu konsiste fundamentalmente iha operasaun ida hodi rekonsilia hotu áta sira ne'ebé too mai husi Sentru Votasaun sira, uza programa informátiku ne'ebé maka sira sei hetan hodi halo servisu ida ne'e. Operasaun apuramentu intermédiu ba rezultadu sira tenke remata ona iha prazu másimu, loron rua nia laran.

Apuramentu nasional ba rezultadu eleitorál nian Assembleia Apuramentu Nasional maka sei asegura, kompostu husi membru Komisaun Nasional Eleisaun ne'ebé iha responsabilidade atu halo rekonsiliaun ba áta apuramentu munisipál sira hotu, áta apuramentu Rejiaun Administrativa Espesiál Oe-Cusse Ambeno no áta apuramentu iha estranjeiru nian hodi apura loloos rezultadu final eleisaun ba Parlamentu Nasional nian atu nune'e bele apresenta ba Supremu Tribunal Justisa para órgaun ne'e bele halo validasaun no proklama nia rezultadu.

Ho nune'e, Governu dekreta, tuir saida maka hatuur ona iha n.º 5, artigu 4.º, n.º 3 artigu 36.º husi alíneas c) no d), husi Artigu 77.º, hotu kedas, husi Lei n.º 6/2006, 28 Dezembru, iha redasaun ne'e hetan aprovasaun husi Lei n.º 9/2017, 5 Maiu, atu hetan kbiit nudár regulamentu, sira tuir mai ne'e:

KAPÍTULU I DISPOZISAUN JERÁL

Artigu 1.º Objetu

Dekretu ida ne'e aprova regra sira hirak ne'ebé maka regula votasaun, kontajen votu no apuramentu rezultadu ba operasaun eleisaun Parlamentu Nasional nian ne'ebé hala'o iha territóriu nasional.

Kapítulu II ORGANIZASAUN SENTRU VOTASAUN

Seksaun I Definisaun, lokalizasaun, organizasaun e divulgasaun

Artigu 2.º Definisaun

Sentru votasaun fatin ne'ebé maka eleitor sira atu ejerse sira nia direitu atu vota no kompostu husi estasaun votu ida ka liu husi ida.

Artigu 3.º Distribuisaun sentru votasaun sira

1. Iha kada suku sei instala pelu-menus sentru votasaun ida no STAE sei kria tan sentru votasaun seluk bazeia ba número eleitor no mós distánsia entre aldeia sira iha suku laran hodi la prejudika protesau ba votu segredu.
2. Atu bele loka sentru votasaun ida rekere ezisténsia husi eleitor entre 50 to'o 2500.

Artigu 4.º

Fatin iha ne'ebé bele tau sentru votasaun

1. Sentru votasaun sira instala iha edifísiu públiku, prefere liu iha eskola sira, ne'ebé iha kondisaun seguru no eleitor sira bele asesu.
2. Wainhira la-iha edifísiu públiku sira ne'ebé bele oferese kondisaun sira hatuur iha número anterior, maka tenke husu fali sede suku ka sentru komunitariu sira.
3. La-iha possibilidade hodi asegura fatin sira refere husi artigu ida ne'e, maka STAE sei halo estrutura ida kona-bá fatin sira ne'ebé bele instala sentru votasaun no estasaun votu,.

Artigu 5.º

Fatin ne'ebé bandu atu instala sentru votasaun

Labele instala sentru votasaun iha:

- a) Unidade polísia;
- b) Unidade militar;
- c) Xefes tradisionál sira nia hela-fatin/rezidénsia
- d) Hela-fatin/rezidénsia privada;
- e) Edifísiu sira ne'ebé nudár propriedade partidu ruma nian;
- f) Fatin kultu ka destinadu ba kultu;
- g) Hospital ka kualkér edifísiu ligadu ba servisu sira saúde nian hodi la prejudika ba ezersísiu direitu votu nébe'e estabelese iha hospital.

Artigu 6.º

Estasaun votu

1. Iha sentru votasaun ida bele iha estasaun votu ida ka liu husi ida.
2. Número estasaun votu husi kada sentru votasaun determina husi Diretor-Jeral Sekretáriadu Tékniku Administrasaun Eleitorál hodi konsidera número eleitor iha suku no mós sentru votasaun ne'ebé mós sei estabelese fila fali.

Artigu 7.º

Divulgasaun lista sentru votasaun

Sekretáriadu Tékniku da Administrasaun Eleitorál (STAE) sei fó sai número no lokalizasaun ba sentru votasaun no estasaun votu sira até lora tolu-nulu antes lora votasaun, no bele mós hetan alterasaun ruma até lora sanulu antes data realizasaun votasaun nian.

Artigu 8.º

Kódigu identifikasaun sentru votasaun no estasaun votu

1. Sei atribui kódigu numérikus ida hodi identifika kada sentru votasaun no estasaun votu

2. Kódigu ne'ebé temi iha número ida foin liu ba ne'e forma husi díjitu sia, no husi ida ne'e, díjitu lima primeiru ne'e representa sentru votasaun no hat ikus representa estasaun votu, no ho ida ne'e permite atu identifika kada sentru votasaun no estasaun votu sira.
3. Kódigu sira refere iha número anterior tau iha urna sira no iha lista eleitor nian, no mós iha ata funcionamentu, kontajen no apuramentu votu.

Seksaun II

Ofisiál eleitorál

Artigu 9.º

Definisaun

1. Ofisiál eleitorál maka sidadaun nasional hirak ne'ebé selesionadu ona husi STAE hodi asegura funcionamentu sentru votasaun no estasaun votu durante prosesu eleitorál
2. Iha loron eleisaun, bele la tama servisu, Ofisiál eleitorál hirak ne'ebé maka mós funcionáriu públiku sira, ajente sira ka traballadór administrasaun públika sira nian no ida ne'e sei la prejudika sira nia direitu no regalia sira, inklui direitu ba retribuisaun, basta maka sira tenke iha dokumentu ida ne'ebé STAE emite hodi komprova katak sira ejerse duni sira nia funsaun nudár ofisiál eleitorál iha loron ne'e.

Artigu 10.º

Identifikasaun

1. Kada sentru votasaun no estasaun votu sira kompostu husi ofisiál eleitorál hanesan tuir mai ne'e:
 - a. Prezidente sentru votasaun nian ida, ne'ebé responsabiliza ba sentru votasaun no mós estasaun votu sira;
 - b. Sekretáriu ida ba estasaun votu ne'ebé maka responsabiliza ba estasaun votu ne'e, koordena servisu ho ofisiál estasaun votu sira no responde direktamente ba presidente sentru votasaun nian;
 - c. Ofisiál na'in-hat ne'ebé sei verifika eleitor sira nia identifikasaun;
 - d. Ofisiál ida hodi kontrola boletin votu nian;
 - e. Ofisiál na'in-ida sei kontrola urna eleitorál/kaixa votasaun nian;
 - f. Ofisiál ida hodi kontrola no tau tinta-indelével ba eleitor sira nia liman;
 - g. Ofisiál na'in rua para kontrola forma-liña/fila.
2. Estasaun de votu ida bele funsiona nafatin ho de'it ofisiál, mínimu, na'in neen.
3. Karik ofisiál eleitorál sira falta tiha na'in ida, sei substitui tuir termu sira ne'ebé hatuur iha artigu 15º.

Artigu 11.º
Selesaun ofisiál eleitorál

1. STAE maka hili ofisiál eleitorál sira husi eleitor sira ne'ebé maka resensiadu ona iha unidade jeográfika resenseamentu eleitorál ne'ebé maka sentru votasaun no estasaun votu ne'e lokaliza ba, atu nune'e sira bele ejerse sira nia funsaun.
2. Atu sai ofisiál eleitorál, sidadaun ne'e tenke hatene lee, hakerek no iha koñesimentu uitoan kona ba aritmética
3. Kandidatu sira ne'ebé atu prienxe vaga hodi ejerse funsaun nudár ofisiál eleitorál ne'e pre-selesionadu husi Diretór Munisipál STAE nian iha unidade jeográfika resenseamentu eleitorál ne'ebé sei lokaliza sentru votasaun ne'ebé ofisiál eleitorál sira ne'e atu dezempeña sira nia funsaun bá.
4. Depois prosesu pre-selesaun ne'e remata tiha, Diretór Munisipál STAE haruka ba Diretór Jerál STAE, lista kompleta husi kandidatu sira ne'ebé maka bele hala'o funsaun nudár ofisiál eleitorál, akompaña kedas ho sira ida-idak nia "*Kurrikulum Vitae*"
5. Metade husi kandidatu ne'ebé selesionadu tenke ser husi sexu femininu
6. Bazeia ba informasaun ne'ebé prevee iha número 4, Diretór Jerál STAE, depois de rona husi CNE, sei nomeia ofisiál eleitorál hirak ne'ebé maka sei ejerse sira nia funsaun iha sentru votasaun
7. Labele obriga ema ida atu hala'o funsaun nudár ofisiál eleitorál, kontra nia vontade livre no espresa
8. CNE sei supervizona prosesu selesaun kandidatu sira hirak ne'ebé maka sei hala'o papel nudár ofisiál eleitorál.

Artigu 12.º
Formasaun ofisiál eleitorál

1. Kandidatu sira ne'ebé STAE hili ona hodi sai nudár ofisiál eleitorál, sei tuir formasaun ne'ebé prepara no realiza husi STAE, ho CNE nia supervizaun.
2. Ofisiál sira labele komesa sira nia funsaun, antes asina deklarasaun kompromisu, ne'ebé husu atu rai sijílu kona ba faktu sira, informasaun no prosedimentu eleitorál ne'ebé maka sira sei hatene durante hala'o sira nia funsaun.
3. Deklarasaun kompromisu ne'e, STAE maka sei elabora no sei vinkula ka kesi ofisiál eleitorál sira to prosesu eleitorál ne'ebé sira ejerse funsaun bá ne'e remata.
4. Representante no fiskais husi partidu polítiku no koligasaun partidaria sira, nune'e mós ho observadór nasional no internasionál, bele akompaña formasaun ne'e, maibé laiha direitu atu intervein iha prosesu.

Artigu 13.º
Ofisiál Eleitorál sira nia devér

1. Hodi ejerse sira nia funsaun, ofisiál eleitorál sira vinkuladu atu kumpre devér sira hanesan tuir mai ne'e:

- a. Tuir formasaun ne'ebé STAE realiza;
 - b. Mantén komportamentu ne'ebé neutral no imparsiál ba kandidatura sira hotu-hotu;
 - c. Garante sijílu (labele fó sai arbiru) informasaun ho karákte rezervada ne'ebé maka hatene durante hala'ó knar;
 - d. Hala'ó ho didi'ak no loloos, tarefa sira hotu, to prosesu eleitorál ne'e remata;
 - e. Tenke relata kedas ba superior sira, karik mosu irregularidade ruma durante prosesu votasaun, kontajen no apuramentu rezultadu;
 - f. Kumpre ho loloos orientasaun hirak ne'ebé maka superior sira fó
2. Ofisiál eleitorál sira, kuandu la kumpre sira nia devér, sei responsabiliza tuir lei ne'ebé vigora

Artigu 14.º
Inkompatibilidade sira

1. Prezidente Repúblika, deputadu sira, membru governu, funsionáriu sira, ajente no traballadór administrasaun públika sira Repúblika Demokratika Timor-Leste nian, membru FALINTIL-Forsa Defeza Timor-Leste no Polisia Nasional Timor-Leste, majistradu judisiál, Ministériu Públiku, autoridade relijoza sira, membru CNE, kandidatu no fiskais kandidatura sira, sira ne'e hotu labale sai nudár ofisiál eleitorál;
2. Saida de'it maka temi iha número anterior ne'e sei la inklui funsionáriu diplomátika sira.

Artigu 15.º
Substituisaun Ofisiál Eleitorál

1. Karik iha lora eleisaun no minutu tolu-nulu antes oras markada ba eleisaun atu hahú maka ofisiál eleitorál sira ne'ebé Diretór Jerál STAE nian nomeia tiha ona la marka prezensa iha estasaun votu, prezidente sentru votasaun nian tenke komunika kedas buat ne'e ba Diretór Munisipál STAE nian.
2. Diretór Munisipál STAE nian bele nomeia fali eleitor kualkér ida ne'ebé iha kapasidade rekoñesidu, hodi troka ofisiál ida ne'ebé falta, liu husi konkordánsia maioria ofisiál eleitorál sira ne'ebé maka marka prezensa iha fatin votasaun ne'e.
3. Karik prezidente sentru votasaun auzente, sekretáriu primeira estasaun votu husi sentru ne'e rasik maka sei troka nia, no nia rasik bele troka husi ofisiál verifikador identifikasaun ne'ebé maka maioria husi ofisiál eleitor estasaun votu ida ne'e nian hili rasik.
4. Kuandu troka ona, ofisiál eleitorál sira ne'ebé maka falta ne'e la konta ona, no prezidente sentru votasaun tenke komunika kedas sira nian naran ba STAE.
5. Substituisaun hotu-hotu tenke hakerek hotu kedas iha ata.

Artigu 16.º
Prezidente Sentru Votasaun

Prezidente sentru votasaun nia papel maka:

- a) Deklara loke estasaun votu no verifika identidade no kredensiál husi sekretáriu estasaun votu nian;
- b) Asegura funksionamentu ne'ebé di'ak iha sentru votasaun tuir lei no regulamentu sira ne'ebé vigora;
- c) Haruka taka relasaun nominal partidu polítiku ka koligasaun partidaria sira nian iha kedas entrada ba sentru votasaun nian;
- d) Presta informasaun no transmite orientasaun servisu ne'ebé nesesáriu atu bele garante operasaun eleitorál ida ne'ebé di'ak iha sentru votasaun ne'ebé nia prezide;
- e) Suspende operasaun eleitorál karik iha perturbasaun ruma, agresaun ka violénsia, iha sentru votasaun nomos iha sorin-sorin sira besik kedas iha ne'ebá;
- f) Dirije kontajen votu no apuramentu inisiál rezultadu iha sentru votasaun;
- g) Ejerse votu de qualidade kuandu haree katak nesesáriu;
- h) Asina ata ho rezultadu kontajen votu nian iha sentru votasaun;
- i) Organiza fiskais kandidatura sira iha sentru votasaun ne'ebé asina ata operasaun kontajen no apuramentu rezultadu nian;
- j) Anunsia rezultadu kontajen no apuramentu inisiál no taka rezultadu ne'e iha fatin ne'ebé fasil para atu haree, iha kedas sentru votasaun ne'e rasik;
- k) Garante enpakotamentu no entrega material eleisaun tomak ba assembleia apuramentu munisipál ka rejionál;
- l) Dezempeña funsaun hotu ne'ebé prevista iha lei, regulamentu ka tuir ne'ebé superior sira haruka no funsaun sira ne'ebé maka la'ós atribui ba órgaun seluk.

Artigu 17.º
Sekretáriu estasaun votu

Sekretáriu estasaun votu nia papel maka:

- a) Deklara loke estasaun votu no verifika identidade no kredensiál husi ofisiál eleitorál sira nian, fiskais kandidatura sira ne'ebé hala'ó sira nia funsaun iha fatin votasaun ne'e nomos observadór ho mós profesionál órgaun komunikasaun sosiál sira;
- b) Dirije prosesu verifikasaun kabina votu no dokumentu servisu nian iha estasaun votu
- c) Hatudu urna/kaixa votasaun mamuk ba ofisiál meza sira, fiskais kandidatura, observadór no eleitor ne'ebé marka prezensa, no tuir mai, husu ba ofisiál verifikador identifikasaun nian nomos ofisiál kontroladór urna eleitorál atu bele tau tiha selu ba urna no rejista número husi selu korespondente;
- d) Haruka taka edital ho kompozisaun meza estasaun votu nian iha estasaun votu, iha kedas fatin ne'ebé maka fasil para atu haree,;

- e) Garante liberdade no segredu votu, eleitor hotu-hotu nian;
- f) Garante manutensaun orden iha estasaun votu para aseguera operasaun eleitorál bele la'ó ho didi'ak;
- g) Informa presidente sentru votasaun karik iha fali ona kondisaun hodi kontinua votasaun ne'ebé interrompe tiha tanba iha akontesimentu balun ne'ebé la normal, kalamidade natural ka perturbasaun orden públika ruma;
- h) Haruka sai husi estasaun votu, sidadaun sira ne'ebé maka la vota iha ne'ebá ou ka sira ne'ebé vota tiha ona;
- i) La admite atu tama iha estasaun votu, eleitor sira ne'ebé maka haree momoos katak lanu hela ka hetan hela efeitu husi droga (estupefasiante) nian, no lori objetu balun ne'ebé maka bele kria perigu;
- j) Bandu kualkér tipu propaganda iha estasaun votu nia laran, no ho distánsia too metru ruanulu-resin-lima, no halo ida ne'e ho rekore ba forsa de seguransa polisiál;
- k) Autoriza entrega boletin votu foun ba eleitor sira, karik sira husu tanba halo sala wainhira sira prienxe ka tanba falta atensaun, no okorensia ida ne'e tenke rejista tiha kedas iha ata ida-idak;
- l) Tau karimbu ba boletin votu ne'ebé maka entrega fila fali, ho lia-fuan "cancelado", asina tiha kedas no rai didi'ak tiha iha envelope;
- m) Fó esklaresimentu nesesáriu, tuir eleitor nia pedidu, no iha kedas prezensa ofisiál eleitorál sira, fiskais kandidatura no observadór eleitorál, kona ba prosesu votasaun, maibé labele influencia fali eleitor sira nia sentidu votu;
- n) Husu ba fiskais kandidatura sira, keta sira iha reklamasaun balun atu apresenta karik;
- o) Simu protestu hotu no reklamasaun ne'ebé maka mosu, no tenke asina kedas nune'e, hanesan ofisiál hotu-hotu estasaun votu nian;
- p) Halo mós funsaun sira seluk ne'ebé maka temi iha lei, regulamentu, ou sira ne'ebé superior haruka, maibé la'ós funsaun hirak ne'ebé maka atribuida ona ba órgaun seluk.

Artigu 18.º

Ofisiál verifikador identifikasaun

Ofisiál verifikador identifikasaun nia papel maka:

- a. Identifika eleitor liu husi haree ho didi'ak kartaun eleitorál atualizadu no verifika didi'ak hodi haree, se dados eleitor nian ne'e hakerek mós iha lista eleitor unidade jeográfika resenseamentu eleitorál nian ka lae;
- b. Karik kartaun eleitorál laiha, bele identifika eleitor liu husi haree nia billete identidade ka pasaporte timor nian no konfirma ho dadus eleitor nian ne'ebé maka tau iha lista eleitor unidade jeográfika resenseamentu eleitorál ida ne'e ninian;
- c. Verifika se eleitor ne'e kumpre rekezitu legal ne'ebé ezije kona ba idade minima tinan sanulu-resin-hitu iha loron eleisaun nian;

- d. Haree didi'ak eleitor nia liman hodi bele garante katak nia seidauk vota duni iha eleisaun ne'e;
- e. Fó hatene ba ofisiál kontroladór boletin votu katak ema ne'e iha direitu no bele entrega boletin votu ba nia;
- f. Dezempeña mós funsaun hirak ne'ebé maka lei, regulamentu haruka ka superior determina maibé la'ós tok funsaun hirak ne'ebé maka atribui ona ba órgaun seluk.

Artigu 19.º
Ofisiál kontroladór boletin votu

Ofisiál kontroladór boletin votu nia papel maka:

- a. Tau karimbu no asina iha boletin votu nia kotuk;
- b. Entrega boletin votu ba eleitor;
- c. Presta informasaun ba eleitor ne'ebé simu ona boletin votu, iha kedas fiskais no observadór sira nia oin iha estasaun votu, karik nia husu informasaun no esklaresimentu ruma kona ba oinsá atu vota, maibé labele indika ba sira, preferénsia ruma ka sentidu votu ruma kona ba atu vota ba kandidatu ida ne'ebé;
- d. Indika no enkamiña eleitor ba kabina votu nian;
- e. Entrega boletin votu foun ba eleitor ho autorizasaun sekretáriu estasaun votu nian, karik eleitor husu, tanba boletin át tiha ka prienxe sala tiha;
- f. Dezempeña mós funsaun hirak ne'ebé maka lei, regulamentu haruka ka superior determina mas la'ós tok funsaun hirak ne'ebé maka atribui ona ba órgaun seluk.

Artigu 20.º
Ofisiál kontroladór urna eleitorál

Ofisiál kontroladór urna eleitorál nia papel maka:

- a. Garante guarda no seguransa urna eleitorál nian;
- b. Asegura katak eleitor koloka de'it boletin votu ida ba urna eleitorál;
- c. Dezempeña mós funsaun hirak ne'ebé maka lei, regulamentu haruka ka superior determina mas la'ós tok funsaun hirak ne'ebé maka atribui ona ba órgaun seluk.

Artigu 21.º
Ofisiál kontroladór aplikasaun tinta indelevel

Ofisiál kontroladór aplikasaun tinta indelevel nia papel maka:

- a) Depois eleitor hatama tiha boletin votu ba urna laran, tau kedas tinta indelevel ba liman-fuan indikadór husi eleitor nia liman loos no sertifika katak tinta ne'e maran duni.
- b) Karik liman fuan indikadór husi parte loos laiha karik, bele tau tinta indelevel ba iha liman-fuan seluk husi liman hanesan, maibé karik liman loos rasik laiha, bele tau ba liman fuan ida iha parte karuk no sertifika duni katak tinta ne'e maran tiha;

- c) Karik liman rua ne'e laiha hotu, marka tinta indelével ne'e iha extremidade husi eleitor nia isin parte leten nian;
- d) Husu ba eleitor atu ses husi estasaun votu hafoin vota tiha;
- e) Dezempeña mós funsaun hirak ne'ebé maka lei, regulamentu haruka ka superior determina mas la'ós tok funsaun hirak ne'ebé maka atribui ona ba órgaun seluk.

Artigu 22.º
Ofisiál kontroladór fila

Ofisiál kontroladór liña/fila nia papel maka:

- a. Organiza liña/fila ne'ebé eleitor sira forma bá hodi hein atu vota, atu nune'e, so ema ne'ebé autorizada de'it maka bele tama ba estasaun votu;
- b. Husu ba eleitor para bele kaer kedas iha sira nia liman kartaun eleitorál ne'ebé atualizadu, karik ida ne'e laiha, uza de'it billete identidade ou pasaporte timor nian, atu nune'e bele hatudu ba ofisiál verifikador identifikasaun;
- c. Iha tuku sanulu-resin-lima loraik iha lora votasaun nian, haree tok, eleitor hira maka hein hela iha liña para atu ba vota, atu nune'e bele halo tuir saida maka lei haruka katak se se de'it maka atu mai tama iha liña depois de oras ida ne'e, sei la hatán;
- d. Husu ba fiskais kandidatura no observadór eleitorál sira hodi hatudu sira nia identifikasaun no kredensiál ne'ebé STAE emite para sira bele akompaña prosesu eleitorál ne'ebé la'ó hela;
- e. Husu ba profesionál órgaun komunikasaun sosiál sira hodi hatudu sira nia identifikasaun no kredensiál ne'ebé STAE emite para sira bele halo kobertura jornalística ba prosesu eleitorál ne'ebé la'ó hela;
- f. Dezempeña mós funsaun hirak ne'ebé maka lei, regulamentu haruka ka superior determina mas la'ós tok funsaun hirak ne'ebé maka atribui ona ba órgaun seluk.

Seksaun III
Ordem, disiplina, prohibisaun no intervensaun polisiál

Artigu 23.º
Responsabilidade manutensaun orden no Disiplina

Prezidente kada sentru votasaun ho sekretáriu estasaun votu nian, ho apoiu husi ofisiál eleitorál sira, halo providénsia nesesária atu bele garante manutensaun orden no disiplina durante operasaun eleitorál atu nune'e bele salva guarda liberdade votu no nia ezersísiu regular.

Artigu 24.º
Prohibisaun prezensa iha sentru votasaun

- 1. Sei la admite atu mai iha sentru votasaun no estasaun votu nian, eleitor hirak ne'ebé maka apresenta sintoma sira momoos katak ema ne'e konsume álkool ka lanu hela ho

droga (estupefasiendes), ema hirak ne'ebé maka lori kilat ka objetu sira ne'ebé hanesan, nomos ema hirak ne'ebé maka, ho kualkér meiu, perturba no tenta perturba orden no disiplina iha fatin votasaun no ninia sorin-sorin sira, no bele lori ba eventual responsabilidade kriminál.

2. Fa'an sasán no konsumu bebida alkolika sira atu dook metru 100 husi sentru votasaun.
3. Mos sei la hatán, atu marka prezensa iha sentru votasaun no estasaun votu, sidadaun eleitor hirak ne'ebé maka ejerse tiha ona nia direitu vota nian, sira ne'ebé maka la'ós fiskais kandidatura sira nian, la'ós profesionál órgaun komunikasaun sosiál no la'ós observadór eleisaun ne'ebé hetan ona kredensiál.

Artigu 25.º

Prohibisaun propaganda eleitorál

1. Iha lora eleisaun, proibidu atu halo kualkér tipu propaganda eleitorál iha fatin hirak ne'ebé maka funsiona sentru votasaun no estasaun votu no tenke dook metru atus-ida husi fatin sentru votasaun.
2. Propaganda eleitorál ne'e maka hanesan taka autokolante (stiker), kamizola, pamfletu, símbolu, poster, emblema, sigla, bandeira no sira seluk tan, nune'e mós ho atividade sira promosaun partidu polítiku ka koligasaun partidu polítiku ruma, ligadu ba prosesu eleitorál ne'ebé maka la'o hela.
3. Prezidente husi Sentru Votasaun sei husu ba PNTL atu hasai propaganda ne'ebé viola dispostu nº-1 husi artigu ida-ne'e.
4. Fiskais partidu polítiku ka koligasaun partidu polítiku sira, labele, iha sirkunstánsia saida de'it, apresenta-an iha sentru votasaun ho símbolu ka objetu sira ne'ebé identifika katak sira pertense ba partidu polítiku ka koligasaun partidu polítiku sira ruma
5. Kona-ba kazu ne'ebé temi tiha iha número dahuluk, Sekretáriu husi Sentru Votasaun fó orden ba Fiskál atu hasai símbolu no objetu hirak ne'ebá
6. Bainhira Fiskál la rona no la-tuir orden, Sekretáriu husi Sentru Votasaun hasain Fiskál nia akreditasaun no husu nia atu sai husi Estasaun Votu no hakerek kedas akontesimentu ne'e iha akta operasaun eleitorál nian.

Artigu 26.º

Prohibisaun ba prezensa husi Forsa Armada no Forsa polisiál

1. Proibidu ba prezensa husi elementu forsa armada no polisiál hodi hala'ó sira nia ezersísiu iha sentru no estasaun votu nia laran wainhira prosesu votasaun sei la'o hela
2. Autoriza de'it prezensa husi elementu Polícia Nacional de Timor-Leste (PNTL), iha li'ur, ho medida liu husi metru rua-nulu resin lima dook husi sentru ka estasaun votu wainhira prosesu votasaun sei la'o hela.

Artigu 27.º

Prezensa no intervensaun husi elementu Polisia Nasionál Timor-Leste (PNTL)

1. Bainhira prezisa hakotu ema ataka malu ka hapara violénsia ruma iha Sentru Votasaun ka Estasaun Votu nia laran ka iha fatin hale'u, ka bainhira ema la rona no la haktuir

Ofisiál Eleitorál sira, Prezidente husi Sentru Votasaun ka Estasaun Votu nian, ka ema ne'ebé taka nia fatin, halibur kedas ho Ofisiál Eleitorál sira no husu tuir prezensa PNTL nian

2. Rekerimentu hodi husu PNTL nia prezensa halo liuhusi kontaktu ho ajente polisiál sira-ne'ebé la'ó hale'u besik Sentru Votasaun ka, bainhira la hetan sira, bá loos to'ó Komandante PNTL nian iha área munisipál ne'ebá ka Região Administrativa Especial Oe-Cusse Ambeno, konforme kazu.
3. Bainhira ajente sira husi PNTL iha hela Sentru Votasaun nia laran, hapara lai lala'ok votasaun nian.
4. Tenke hakerek iha Estasaun Votu nia akta tanba razaun hirak-ne'ebé maka husu tuir prezensa husi PNTL no tempu hira maka ajente sira hela iha Estasaun ne'ebá.
5. Bainhira iha sinál ka lala'ok ruma hodi asegura katak ema hata'uk Ofisiál Eleitorál sira, liuhusi taterak sira-nia isin ka malahuk sira-nia neon, atu, nune'e, Prezidente la bolu polísia, Komandante rasik halo intervensaun atu prosesu eleitorál la'ó nafatin hanesan baibain, no ramata intervensaun bainhira Prezidente ka ema ne'ebé taka nia fatin husu atu ramata, ka, komandante rasik maka ramata no sai bainhira haree katak la prezisa ona nia prezensa iha fatin ne'ebá
6. Bainhira prezisa, Komandante husi Forsa Polisiál ka ema ne'ebé taka nia fatin, bele vizita maibé la lori kilat hodi tama lalais de'it, la liu minutu 10, iha Sentru Votasaun no Estasaun Votu atu halo kontaktu ho Prezidente ka ema ne'ebé taka Prezidente nia fatin.
7. Iha kazu ne'ebé temi tiha ona iha nº1 husi artigu anterior, no bainhira de'it prezisa prezensa husi polísia, PNTL, tenke bá hodi fó apoiu no elementu sira-ne'ebé lakohi bá fó-an kedas iha responsabilidade dixiplinár.

Kapítulu III

Prosesu votasaun

Seksaun I

Direitu votu

Artigu 28.º

Direitu votu

1. Sidadaun hotu-hotu ho tinan sanulu-resin-hitu ona iha direitu atu vota no eleitu.
2. Ezersísiu direitu sufrájiu ne'e pesoál no konstitui devér síviku.
3. Direitu votu ne'e ejerse direta, pesoál no prezensialmente husi eleitor ida-idak
4. Eleitor ida, so bele vota dala ida de'it.
5. Ezersísiu direitu votu ne'e depende ba inskrisaun previa eleitor ne'e rasik iha resenseamentu eleitorál.

Artigu 29.º
Eleitor servisu iha loron Eleisaun

1. Funsionáriu no ajente estadu sira, membru polísia nasional Timor-Leste, membru F-FDTL, no traballadór iha misaun diplomátika sira no misaun observaun eleitorál ne'ebé maka presta sira nia servisu iha loron eleisaun, iha ámbitu prosesu eleitorál nian, sei ejerse sira nia direitu votu iha sentru votasaun ne'ebé besik liu ba fatin ne'ebé sira presta sira nia servisu.
2. Entidade sira ne'ebé maka emprega funsionáriu públiku, ajente administrasaun públika no traballadór ne'ebé ligadu ba número anterior, tenke envia ba STAE, too loron rua nulu husi data ne'ebé markada ba eleisaun, relasaun nominal kompleta husi kada funsionáriu ka ajente administrasaun públika sira ne'ebé presta servisu iha ámbitu prosesu eleitorál no identifika fatin ne'ebé servisu ne'e sei realiza
3. Entidade sira ne'ebé maka hala'o atividade observaun iha loron eleisaun bele ejerse sira nia direitu iha fatin ne'ebé hala'o atividade sira bá iha loron eleisaun, sira nia naran sei hatama iha lista adisionál ba eleitor husi ofisiál eleitorál sira
4. Iha sentru votasaun, sei iha mós lista ida ba eleitor sira ne'ebé maka inskritu iha unidade jeográfika resenseamentu eleitorál seluk maibé bele ejerse direitu votu iha sentru votasaun ida ne'e, bazeia ba saida maka temi iha n.º 2.

Artigu 30.º
Liberdade no Segredu Votu

1. Votu ne'e livre no labele obriga ema ida hodi fó-hatene nia votu, iha sentru votasaun nia laran ka lí'ur, iha fatin ne'ebé nia vota ka atu ba vota.
2. Pozisaun kabina votu nian tenke tau iha fatin ne'ebé bele asegura segredu votu eleitor sira nian.

Artigu 31.º
Eleitor sira ne'ebé labele haree ka iha defisiénsia ruma

1. Sidadaun sira ne'ebé ho defisiénsia matan ka iha defisiénsia ruma ne'ebé la permite sira atu vota mesak, bele ejerse sira nia direitu votu, akompaña husi sidadaun eleitor ruma ne'ebé sira rasik maka hili.
2. Ida ne'ebé akompaña iha obrigasaun atu mantén sijilu kona ba sentidu votu eleitor ho defisiénsia matan ka deficiente ne'e nian.
3. Sekretáriu estasaun votu nian haree loloos hodi sertifika katak akompañante ne'e eleitor rasik maka hili livremente hodi akompaña nia ba ejerse nia direitu vota, ho prezensa husi representante partidu polítiku sira.
4. Karik halo konkluzaun katak, eskolla ba akompañante ne'e la'ós livre, sekretáriu estasaun votu nian tenke kria kondisaun atu nune'e eleitor bele hili fali sidadaun eleitor seluk ida ne'ebé bele akompaña ema ne'e iha nia ezersísiu direitu votu.
5. Iha situasaun sira ne'ebé maka sekretáriu estasaun votu nian sei duvida hela autenticidade sirkunstánsia ka faktu sira ne'ebé refere iha nº 1 hodi permite ezersísiu

direitu votu akompañadu, eleitor ne'e tenke apresenta komprovotativu médiku ne'ebé sertifika faktu ka sirkunstánsia sira ne'ebé impede nia atu halo mesak nia ezersísiu direitu votu.

Seksaun II

Fatin ne'ebé eleitor ejerse nia direitu votu iha periodu votasaun

Artigu 32.º

Fatin ne'ebé eleitor ejerse nia direitu votu

1. Iha territóriu nasional, kada eleitor vota iha sentru votasaun tuir suku ne'ebé maka indika iha nia kartaun eleitorál.
2. Iha suku sira ne'ebé instala sentru votasaun liu husi ida, eleitor sira sei hetan indikasaun ida husi Sekretáriadu Tékniku Administrasaun Eleitorál liu husi marka ida iha eleitor sira nian kartaun eleitorál ne'ebé hatudu sentru ida ne'ebé sira atu vota bá
3. Haktuir ida ne'ebé temi ona iha número anterior, STAE indika eleitor sira ba iha sentru votasaun ida ne'ebé besik liu bá sira nia hela fatin
4. Modelu husi marka ida ne'ebé previstu iha n.º 2 ne'e aprova husi Diretor-Jeral STAE

Artigu 33.º

Oráriu funsionamentu

Sentru votasaun hodi ezersísiu direitu votu

1. Iha lora votasaun, sentru votasaun no estasaun votu sira sei loke iha tuku hitu no taka iha tuku sanulu-resin-lima, no durante periodu loke ne'e, sei funsiona sein interrupsaun.
2. Kuandu oras taka nian, hanesan ne'ebé maka temi iha número anterior, liu ona, so ema hirak ne'ebé maka iha altura ne'ebá forma tiha ona iha liña maka bele ejerse nia direitu votu, kontroladór liña na'in rua sira sei haré ida ne'e no komunika ba presidente sentru votasaun nian.

Artigu 34.º

Kontinuidade husi operasaun eleitorál

Votasaun sei la'o la ho interrupsaun tuir oráriu funsionamentu ne'ebé previstu iha artigu anterior.

Artigu 35.º

Interupsaun operasaun eleitorál

1. Sei labele hala'o votasaun iha kualkér sentru votasaun no estasaun votu ruma kuandu:
 - a. Votasaun ne'e labele organiza, akontese problema ruma ne'ebé interrompe tiha operasaun eleitorál liu husi oras rua, ou akontese dezastre-boot/kalamidade boot ruma iha lora ne'ebé markadu tiha ona ba eleisaun;
 - b. Akontese dezastre-boot/kalamidade ruma lora tolu antes lora eleisaun

2. Kuandu labele duni hala'ó eleisaun, tenke komunika kedas ba delegadu CNE nian ne'ebé marka prezensa iha lokál, depois hatene loloos tiha akontesimentu husi kualkér faktu ne'ebé temi iha número anterior.
3. Kuandu votasaun interrompe tiha liu husi oras rua signifika estasaun votu ne'e tenke taka ona no entrega fila-fali ona urna seladas ne'ebé hetan ona votu balun ba assembleia apuramentu munisipál ka rejionál.
4. Iha kazu sira ne'ebé previstu iha alínea a) husi nº 1, sei fó hatene eleitor sira atu bele ba vota fali iha sentru votasaun no estasaun votu ne'ebé besik liu.
5. Iha kazu ne'ebé previstu iha alínea b) nº 1, STAE, ho akordu delegasaun CNE ne'ebé marka prezensa iha lokál ne'e, transfere lokalizasaun sentru votasaun no estasaun votu ne'e ba fatin ne'ebé seguru liu.
6. Iha kazu sira ne'ebé temi iha alínea anterior, eleisaun sei hala'ó fali iha loron hitu tuir mai, konta husi loron ne'ebé atu hala'ó votasaun ida ne'ebé la too realiza ne'e.

Seksaun III Buletin Votu

Artigu 36.º Definisaun

Buletin votu iha nia forma retangular, ho dimensaun apropiada atu nune'e bele tau kandidatura sira hotu-hotu iha ne'ebá no cetak/imprensa iha surat-tahan mutin, kaber no la transparente.

Artigu 37.º Elementu integrante sira

1. Iha kada boletin votu sei cetak/tau sigla ka bandeira husi partidu polítiku ka koligasaun partidaria sira nian tuir modelu ne'ebé maka STAE apresenta no ho aprovasaun CNE nian, bandeira ka emblema tenke koloridu hanesan ho ne'ebé tau iha prosesu inskrisaun partidu polítiku ka koligasaun partidaria hamutuk iha Supremo Tribunal de Justiça.
2. Partido polítiku ka koligasaun partidaria sira nia naran sei hakerek orizontalmente iha boletin votu, tuir sorteiu ne'ebé STJ realiza, no sei tau hotu iha boletin oin, kada bandeira ka emblema nomos kuadrado oan ida-idak, iha fatin ne'ebé eleitor sira sei manifesta sira nia sentidu votu.

Artigu 38.º Transporta boletin votu

1. Hafoin produz tiha, boletin votu sira sei entrega husi Diretór Geral STAE ba Diretór STAE Munisipál no Diretór STAE Rejiaun Administrativa Espesial Oe-Cusse Ambenu ne'ebé nian ne'ebé sei responsabiliza atu transporta boletin sira ne'e ba munisípiu.
2. Transporta boletin votu ne'e sei realiza ho meiu transporte ne'ebé lalais liu no seguru, no bele akompaña mós husi Polisia Nasional Timor-Leste.

3. Diretór Munispál STAE nian no Diretór STAE Rejiaun Administrativa Espesiál Oe-Cusse Ambenu nian sei asegura distribuisaun boletin votu sira ba too sentru votasaun sira, tuir planu operasional ne'ebé aprovalu ona husi Diretór Geral STAE nian.
4. Diretór Munispál STAE no Diretór STAE Rejiaun Administrativa Espesiál Oe-Cusse Ambenu nian promove distribuisaun ba kada sentru votasaun númeru boletin votu ne'ebé koresponde ba númeru eleitor ne'ebé inskritu atu ejerse nia direitu votu, no aumenta liu tan 10% husi númeru ne'e.
5. Transporta no distribuisaun husi material sira ne'ebé temi iha númeru ida liu ba ne'e sei supervizona husi CNE.

Seksaun IV

Operasaun preliminar votasaun sira

Artigu 39.º

Material servisu nian iha kada estasaun votu

STAE sei asegura iha kada sentru votasaun no estasaun votu ida-idak, sei iha fornimentu material eleitorál ne'ebé presiza hodi hala'o sufrájiu, konforme Anexu I regulamentu ida ne'e ninian, ne'ebé halo parte iha efeitus legais hotu-hotu.

Artigu 40.º

Operasaun preliminar sira

1. Iha tuku nen dader iha loron eleisaun nian, presidente sentru votasaun konfirma identidade sekretáriu estasaun votu no fiskais sira ne'ebé partidu polítiku no koligasaun partidaria sira indika ba eleisaun parlamentar nian atu akompaña operasaun eleitorál ne'ebé hala'o iha sentru votasaun
2. Iha tuku nen liu minutu sanulu-resin-lima, sekretáriu estasaun de votu sira sei halo identifikasaun ba ofisiál eleitorál sira husi estasaun votu ida-idak nomos fiskais sira ne'ebé partidu polítiku no koligasaun partidaria sira indika ba eleisaun parlamentar ne'ebé halo sira nian funsaun iha ámbitu ida ne'e nian.
3. Iha tuku nen liu minutu tolu-nulu, sekretáriu estasaun votu informa ba presidente sentru votasaun kona ba ofisiál eleitorál sira ne'ebé maka la mosu mai fatin votasaun atu halo identifikasaun no hahú sira nia funsaun.
4. Iha tuku nen liu minutu tolu-nulu-resin-lima presidente sentru votasaun informa ba Diretór Munispál STAE katak eziste ofisiál eleitorál balun maka falta no husu para bele substitui sira.
5. Iha tuku nen liu minutu hat-nulu-resin-lima, sekretáriu estasaun votu no ofisiál eleitorál, iha fiskais partidu polítiku ho koligasaun partidaria no observadór eleitorál sira nia oin, komesa:
 - a. Verifika kabina votu nian;
 - b. Verifika no hatudu urna votu nia laran ba ema;
 - c. Tau selu ba urna eleitorál no lé ho lian boot númeru husi selu seguransa ne'e;

- d. Rejista tiha númeru selu seguransa ne'e iha ata operasaun eleitorál;
- e. Konta no verifika karimbu sira ne'ebé simu;
- f. Konta boletin votu sira ne'ebé simu;
- g. Hakerek iha ata operasaun eleitorál númeru boletin votu ne'ebé simu ona;
- h. Afixasaun iha odamatan sentru votasaun nian relasaun nominal partidu polítiku no koligasaun partidaria sira ne'ebé admiti ba eleisaun
- i. Afixa iha edital, naran husi ofisiál eleitorál sira ne'ebé servisu iha estasaun votu
- j. Hakerek hotu iha ata operasaun eleitorál, kualkér iregularidade ka insidente sira balun ne'ebé verifika nomos protestu ka reklamasaun sira ne'ebé apresenta iha operasaun preliminar no desizaun sira ne'ebé maka ofisiál eleitorál sira halo sobre reklamasaun ka protestu sira ne'e.

Seksaun V Operasaun votasaun

Artigu 41.º Ordem Votasaun

1. Sein prejuizu husi situasaun hirak ne'ebé maka prevé iha artigu 35º, presidente sentru votasaun nian deklarasaun loka sentru votasaun iha tuku hitu dader iha loron ne'ebé hili tiha ona hodi hala'ó eleisaun no sekretáriu estasaun votu sira mós sei halo hanesan, iha sira ida-idak nian estasaun.
2. Depois deklarasaun ne'ebé prevé iha númeru anterior, ofisiál eleitorál sira ejerse sira ida-idak nia direitu votu iha estasaun ne'ebé sira ida-idak hala'ó sira nia funsaun bá no tuir termu sira ne'ebé maka prevé iha regulamentu ida ne'e.
3. Kuandu prosesu votasaun ba ofisiál eleitorál sira remata ona, eleitor sira mós bele hahú ejerse ona sira nia direitu votu tuir sé maka too uluk, sein prejudika fali orden presedensia ne'ebé maka prevé ona iha artigu 5.
4. Atu bele hetan asesu ba estasaun votu hodi ejerse ida-idak nia direitu sufrajiu, eleitor sira sei forma iha liña, tuir instrusaun ne'ebé maka ofisiál kontroladór liña nian sei fó.
5. Eleitor sira hanesan tuir mai ne'e, goza prioridade atu ejerse direitu votu no tuir orden presedensia:
 - a. Eleitor sira ne'ebé isin rua
 - b. Eleitor sira ne'ebé ho idade boot liu ona tinan nen-nulu-resin-lima;
 - c. Eleitor sira ne'ebé maka hatudu tipu debilidade ruma ka inkapasidade fízika;
 - d. Eleitor sira ne'ebé maka hiti ka kous oan nurak;
 - e. Funsionariu, ajente no traballadór administrasaun públika ne'ebé maka hala'ó hela sira nia knar hodi organiza no realiza prosesu eleitorál.

Artigu 42.º

Prosedimentu hodi identifika eleitor sira

1. Kuandu tama ona iha estasaun votu, eleitor sei entrega ba ofisiál kontroladór fila, kualkér dispozitivu movel ne'ebé sira iha ne'ebé bele uza hodi kapta imajen.
2. Depois de halo tuir saida maka prevé iha número anterior, eleitor apresenta-an iha ofisiál verifikador nia oin hodi identifika-an no hatudu kartaun eleitorál, ka karik laiha bele mós hatudu billete identidade ka pasaporte timor-nian.
3. Ofisiál ne'ebé verifika identifikasaun, depois kumpre tiha formalidade ne'ebé prevé iha número anterior, sei verifika mós se eleitor iha ona tinan sanulu-resin-hitu iha lora votasaun nian, se eleitor nia liman-fuan indikadór liman-loos nian tau ona tinta indelevel ka lae, no eleitor nia naran iha ona lista eleitor inskritu iha resenseamentu eleitorál husi unidade jeográfika resenseamentu ne'ebé sentru votasaun ne'e instaladu ba ka lae .
4. Iha kazu sira ne'ebé maka eleitor identifika-an ona tuir termu da lei ne'ebé prevé iha número 2, nia naran iha lista hanesan ne'ebé hateten iha nº 3, halo tiha ona tinan sanulu resin hitu no nia isin parte leten seidak marka ho tinta indelevel, ofisiál verifikador identifikasaun sei fó tiha sinal iha eleitor nia naran iha lista liu husi dada tiha trasu ida iha naran leten no enkamiña nia ba ofisiál kontroladór boletin votu nian.
5. Kuandu eleitor identifika ona ho kartaun eleitorál ne'ebé indika katak, nia naran inskritu tiha ona iha resenseamentu eleitorál iha unidade jeográfika resenseamentu eleitorál ne'ebé maka sentru votasaun ne'e instala bá, ofisiál verifikador sei inklui eleitor ne'e nia naran iha lista adisionál eleitor nian.
6. Sei tau iha lista adisionál eleitor, ne'ebé temi iha número anterior, eleitor sira nia informasaun hanesan tuir mai ne'e:
 - a. Eleitor ne'e nia naran;
 - b. Número kartaun eleitorál;
 - c. Hela fatin kompletu;
 - d. Eleitor nia assinatura.
7. Iha situasaun ne'ebé maka eleitor la konsege prova nia identidade, nein nia inskrisaun no resenseamentu eleitorál iha unidade jeográfika resenseamentu eleitorál ne'ebé maka sentru votasaun ne'e instala bá ke nia hakarak ejerse nia direitu votu, ofisiál verifikador identifikasaun sei enkamiña nia hodi sai husi estasaun votu.

Artigu 43.º

Prosedimentu entrega boletin votu no votasaun

1. Konklui tiha prosedimentu hodi identifika eleitor, tuir termu artigu anterior nian, no la aplika iha nº 6, ofisiál kontroladór boletin votu sei entrega boletin votu ba eleitor.
2. Buletin votu ne'ebé entrega ba eleitor ne'e tenke asina no tidin karimbu tiha kedas husi ofisiál kontroladór boletin votu.
3. Depois simu tiha boletin votu, eleitor sei tama ba kabina votu nian ne'ebé livre no iha ne'ebá sei ejerse nia direitu sufrájiu.

4. Sidadaun eleitor sei marka sira nia eskolla liu husi koloka sinal ida ka halo kuak iha kuadrado mutin ne'ebé tau iha liña ke koresponde kedas ho kandidatura ne'ebé maka eleitor hakarak vota bá.
5. Tuir mai, eleitor sei dobra boletin votu, ho parte impressa/cetak nian fila ba laran, antes hatama ba urna/kaixa votasaun nia laran.
6. Iha situasaun ne'ebé maka eleitor halo sala ka estraga tiha boletin votu:
 - a. Eleitor bele ba ofisiál kontroladór boletin votu no husu para troka tiha boletin ne'e;
 - b. Ofisiál kontroladór boletin votu sei husu autorizasaun husi sekretáriu estasaun votu nian atu bele troka boletin ne'ebé at tiha ona ho boletin foun;
 - c. Sekretáriu estasaun votu nian autoriza substituisaun boletin votu ne'ebé at ho tau karimbu ida ne'ebé hateten "cancelado" iha lolon no ho asinatura.
 - d. Depois de autoriza tiha hodi troka boletin votu ne'ebé at, ofisiál kontroladór boletin votu sei entrega boletin votu foun ba eleitor ne'ebé husu halo substituisaun boletin votu ne'ebé at tiha ona ne'e, atu nune'e nia bele ba iha kabina votu mamuk ida hodi ejerse nia direitu atu vota.
7. Buletin votu sei introduz iha urna eleitorál iha ofisiál kontroladór urna eleitorál nia oin.
8. Depois eleitor hatama tiha nia votu ba urna eleitorál, nia sei la'ó ba hasoru ofisiál kontroladór aplikasaun tinta indelevel ne'ebé aplika iha termu ne'ebé prevé iha artigu 21º.
9. Konkluui tiha operasaun tau tinta indelevel, eleitor sei sai husi estasaun votu, ho ida ne'e nia bele simu hikas fali dispozitivu kapta imajen nian ne'ebé maka nia husik hela iha kontroladór fila.

Artigu 44.º

Prosedimentu ezersísiu direitu votu iha estabesimentu Hospital no Prizional sira

1. Iha loron eleisaun, ofisiál estasaun husi sentru votasaun ne'ebé besik liu ba estabesimentu hospital públiku sira no estabesimentu prizional sira, sei bá too iha instituisaun sira ne'e atu bele rekolla votu husi sidadaun eleitor hirak ne'ebé maka tama hela ka kumpre hela kastigu prizaun, tuir planu operacional ne'ebé maka STAE defini ona.
2. Ofisiál sira lori-ho urna ne'ebé tau ona selu no ho número ne'ebé suficiente hodi rekolla votu, boletin votu, livru estasaun votu no material hotu-hotu ne'ebé presiza ba halo ezersísiu dirietu votu nian ba sidadaun hirak ne'ebé maka temi iha número ida foin liu ba.
3. Iha prosesu tomak ligadu ba operasaun prosesu votasaun nian, urna sira tenke tau selu hela de'it.

4. Atu rekolla votu iha hospital ofisiál eleitorál sira sei lori urna sai tama, atu nune'e moras sira ne'ebé baixa hela bele vota, tuir ne'ebé maka hatur iha regulamentu ida ne'e, sei uza lista ida eleitor internadu/baixa sira nian, apresenta nafatin kartaun eleitorál ne'ebé atualizadu no, karik ida ne'e laiha, uza billete identidade ka passaporte Timor ninian.
5. Hodi rekolla votu iha prizaun, urna sira sei tau iha fatin ne'ebé maka diretor prizaun determina tiha ona no funsiona tuir regulamentu respektivu, ho lista votante sira ne'ebé maka kumpre hela sira nia kastigu iha prizaun no obrigatoriu nafatin hodi apresenta kartaun eleitorál ne'ebé atualizadu.
6. Eleitor sira ne'ebé maka hala'o hela sira nia knar iha estabelesimentu prizional, iha loron votasaun, no sira nia naran tau tiha ona iha lista eleitor, sei vota uza kartaun eleitorál ne'ebé atualizadu no, karik ida ne'e laiha, vota ho billete identidade no pasaporte Timor ninian.
7. Remata tiha Operasaun husi ekipa ofisiál eleitorál nian, ekipa sei fila hikas ba estasaun votu atu bele hahú taka atividade, tuir termu ne'ebé maka hatur iha regulamentu ne'ebé liga ba prosedimentu sira votasaun, kontajen no apuramentu rezultadu nian.
8. Direitor estabelisimentu prizaun no direitor hospitál nasionál no referál tenke haruka/manda ba STAE lista prizoneiru no guarda-prizoneiru ne'ebé servisu iha loron eleisaun maizumenus antes iha loron 10 nia laran inklui lista doutoor no infermeiru sira ne'ebé servisu iha loron eleisaun no mós pasiente sira ho akompañante pasiente sira.

Artigu 45.º

Dúvida, reklamasaun no protestu sira

1. Kualker eleitor ka fiskal kandidatura, iha periodu funsionamentu estasaun votu, bele hatoo dúvida, protestu no reklamasaun sira kona ba operasaun eleitorál.
2. Dúvida, reklamasaun no protestu sira hirak ne'ebé apresenta durante votasaun ka depois taka votasaun sei hetan análise kedas husi ofisiál eleitorál sira, no karik sira presiza, sira mós bele konsulta ho STAE.
3. Reklamasaun hirak ne'ebé apresenta, tuir número anterior, sei submete ba votasaun husi ofisiál eleitorál no konsidera nudár deferidu karik hetan votu favoravel husi pelu menus sira nain nen.
4. Deliberasaun hotu tenke komunika kedas ba reklamante sira, karik entende katak, bele hatoo reklamasaun sira ne'e ba representante CNE nian, ho nuné atu bele entrega kedas iha sentru votasaun ka estasaun votu ne'ebé maka kestaun ne'e foti, reklamasaun ne'e tenke akompañia mós ho dokumentasaun hotu ne'ebé iha ligasaun ho sentru votasaun ne'e nian.
5. Ba efeitu husi número anterior, CNE sei decide iha prazu oras hitunulu-resin-rua nia laran.

6. Husi desizaun sira ne'ebé CNE halo, bele apresenta rekursu ba STJ iha prazu oras hatnulu-resin-walu nia laran.
7. STJ maka decide kona ba rekursu sira hirak ne'ebé maka apresenta ona ba nia iha prazu oras hatnulu-resin-walu nia laran.

Artigu 46.º
Enseramentu votasaun

1. Iha loron eleisaun, eleitor sira so bele hatán atu tama ba forma iha liña hodi ba vota to tuku sanalu-resin-lima loraik de'it.
2. Depois tuku sanalu-resin-lima, só eleitor sira ne'ebé maka forma nanis tiha ona iha liña laran iha estasaun votu ne'e maka bele ba vota, ida ne'e ofisiál kontroladór liña maka tenke verifica no relata ba sekretáriu estasaun votu nian.
3. Sekretáriu estasaun votu nian sei deklara katak votasaun taka ona kuandu eleitor inskritu sira vota hotu ona ka, depois tuku sanalu-resin-lima loraik, kuandu eleitor sira ne'ebé maka forma hela iha liña laran too oras ne'e, vota hotu ona.

Artigu 47.º
Enseramento operasaun iha estasaun votu

1. Kuandu deklara katak votasaun taka ona no Dúvida, protestu no reklamasau sira rezolve hotu ona, Sekretáriu estasaun votu nian sei:
 - a. Halo kontajen ba boletin votu sira ne'ebé la uza, rejista sira nia numeru ida-idak iha ata estasaun votu nian, sei la uza tan boletin sira ne'e ho hatur tiha karimbu ne'ebé hateten, "la Uza", no tuir mai hatama tiha sira hotu ba iha envelope ne'ebé propiu duni ba boletin hirak ne'ebé maka la too uza;
 - b. Halo kontajen ba boletin votu sira ne'ebé kanseladu, rejista sira nia numeru ida-idak iha ata estasaun votu nian, sei la uza tan boletin sira ne'e ho hatur tiha karimbu ne'ebé hateten, "cancelado", no tuir mai hatama tiha sira hotu ba iha envelope ne'ebé propiu duni ba boletin hirak ne'ebé kanseladu nian;
 - c. Halo kontajen ba boletin votu sira ne'ebé abandonado, rejista sira nia numeru ida-idak iha ata estasaun votu nian, sei la uza tan boletin sira ne'e ho hatur tiha karimbu ne'ebé hateten, "abandonado", no tuir mai hatama tiha sira hotu ba iha envelope ne'ebé propiu duni ba boletin hirak ne'ebé maka abandonadu nian;
 - d. Halo kontajen ba número eleitor hirak ne'ebé maka asinaladu iha lista eleitor sira nian no iha lista adisionál eleitor ne'ebé vota iha estasaun votu ida ne'e, no hakerek tiha número sira ne'e iha ata estasaun votu nian.
2. Sekretáriu estasaun votu nian, ho ajuda ofisiál eleitor sira, koloka urna, ata funsionamentu estasaun votu no material sira ne'ebé refere iha nº 2 husi artigu ida ne'e iha fatin ne'ebé eskollidu ona husi presidente sentru votasaun nian atu nune'e bele hahú halo kontajen ba votu no apuramentu inisiál ba rezultadu eleitorál.

3. Ba efeitu ne'ebé maka temi iha número anterior, presidente sentru votasaun eskolla fatin ne'ebé apropriadu no espasu iha sentru votasaun ne'e rasik, atu nune'e bele garante katak fiskais kandidatura sira, observador eleitorál no profesionál komunikasaun sosiál sira bele akompaña servisu kontajen votu no apuramentu inisial rezultadu eleitorál.
4. Formatu ata funksionamentu estasaun votu konsta iha Anexo II iha diploma ida ne'e, ne'ebé halo parte integral ba efeitu legal sira hotu.

KAPÍTULU IV PROSEDIMENTU KONTAJEN VOTU NO APURAMENTU REZULTADU INISIAL

Artigu 48.º Klasifikasaun votu

Para bele halo kontajen votu no apuramentu rezultadu, sei konsidera nudár:

- a) Validu, boletin votu ne'ebé maka hasai husi urna eleitorál mai, ne'ebé hetan ona asinatura no karimbu husi ofisial kontrolador boletin votu, no hatudu momoos kedas sentidu votu kada eleitor ninian, maibé la revela identidade kada autor ninian;
- b) Branku, boletin votu ne'ebé maka hasai husi urna eleitorál mai, ne'ebé hetan ona asinatura no karimbu husi ofisial kontrolador boletin votu, maibé la hatudu tok kualkér tipu sinal ida;
- c) Nulo, boletin votu ne'ebé maka hasai husi urna eleitorál mai, ne'ebé hetan ona asinatura no karimbu husi ofisial kontrolador boletin votu, iha ona sinal ka tu-kuak ona iha ne'ebá maibé la hatudu loloos sentidu eskolla husi kada eleitor, atu nune'e bele identifika boletin votu ne'e, ka indika eskolla ba kandidatura ida ne'ebé maka deziste ka hakiduk tiha ona husi prosesu eleisaun, ka halo tiha korte, dezeño ka nakles ruma, ka hakerek fali lia fuan balun iha ne'ebá;
- d) Rejeitadu, boletin votu ne'ebé maka hasai husi urna eleitorál mai, ne'ebé laiha asinatura no karimbu husi ofisial kontrolador boletin votu;
- e) Kanceladu, boletin votu ne'ebé maka entrega fila fali ba ofisial eleitorál, hodi troka fali ho boletin votu foun, tanba eleitor halo tiha sala, wainhira nia indika nia eskolla iha boletin ne'e ka boletin ne'e estraga tiha involuntariamente;
- f) Abandonadu, boletin votu hirak ne'ebé maka hetan fali soe hela iha estasaun de votu.

Artigu 49.º Resepasaun no abertura urna nian

1. Urna sira sei entrega husi sekretáriu estasaun votu, akompañadu husi ofisial eleitorál sira no simu husi presidente sentru votasaun nian, iha fatin ne'ebé maka defini antes kedas ona;
2. Presidente sentru votasaun, depois simu tiha urna eleitorál sira ne'e, sei lé ho lian boot, número husi selu seguransa nian no husu ba fiskais kandidatura sira atu bele konfirma número sira ne'e.

3. Kuandu remata tiha konfirmasaun ba númeru selus seguransa nian, presidente sentru votasaun, iha prezensa ofisiál eleitorál, fiskais partidu polítiku no koligasaun partidaria, observadór eleitorál no profesionál komunikasaun sosiál sira ho mós sidadaun hotu ne'ebé maka marka prezensa iha fatin ne'e, komesa loke ona urna eleitorál.

Artigu 50.º **Kontajen Votu**

1. Depois loke tiha urna eleitorál, presidente sentru votasaun komesa hasai boletin votu ne'ebé maka iha hela urna nia laran, dezdoobra tiha boletin sira ne'e no koloka sira iha meza kontajen nia leten, ho parte kotuk fila ba leten atu bele haree se boletin sira ne'e hetan hotu ona asinatura no karimbu husi ofisiál kontroladór boletin votu nian ka lae.
2. Presidente sentru votasaun nian sei rejista iha ata rezultadu sentru votasaun nian, númeru boletin votu ne'ebé maka hasai husi urna laran mai no asinadu no karimbadu lolos ona husi ofisiál kontroladór boletin votu nian.
3. Buletin votu sira ne'ebé maka iha hela urna eleitorál nia laran maibé laiha asinatura no karimbu husi ofisiál kontroladór boletin votu nian, sei separa tiha husi boletin votu sira seluk, depois tau tiha karimbu nudár rejaitadu, sei lé no konta ho lian-boot husi presidente sentru votasaun nian, no nia númeru sei rejista iha ata rezultadu husi sentru votasaun nian.
4. Buletin votu ne'ebé sai husi urna mai mas seidak tidin ho karimbu ne'ebé dehan "rejaitadu", sei kahur hamutuk tiha ho boletin votu ho karakteristika sira hanesan ne'ebé mai husi estasaun votu sira seluk no depois sei agrupa hamutuk iha lote lima-nulu ida.
5. Halo hotu tiha operasaun ne'ebé maka temi iha númeru anterior, presidente sentru votasau nian sei lé ho lian makás, sentidu votu ne'ebé maka hatudu iha kada boletin no hatudu boletin nia oin ba ema hotu ne'ebé marka prezensa iha ne'ebá bele haree no sei tau hamutuk tuir lote ne'ebé koresponde ba kandidatu ida-idak.
6. Buletin votu ne'ebé maka klasifikadu nudár branku ka núlu, sei tau hamutuk iha lote ketak.
7. Buletin votu ne'ebé maka reklamadu, sei tau iha nia fatin rasik.
8. Dúvida, protestu no reklamasaun sira ne'ebé maka apresenta iha operasaun kontajen no apuramentu rezultadu, sei aplika regras sira ne'ebé prevé iha artigu 45º, ho adaptasaun nesessária.
9. Versaun orijinal husi reklamasaun sira sei tau hamutuk ho boletin votu reklamadu iha envelope "boletin votu reklamadu" nian.
10. Rezultadu husi kontajen votu no apuramentu rezultadu nian tenke transmiti kedas via elektronika ba STAE ne'ebé maka sei fó hatene mós ba CNE

Artigu 51.º
Prienxe ata

1. Konta tiha no konfere tiha votu validu sira ba kada partidu polítiku ou kolgasaun partidu polítiku sira, rezultadu sira ne'e sei anota hotu iha ata rezultadu nian iha sentru votasaun no boletin votu ne'ebé maka identifikadu nudár "votu válidu", fahe ketak-ketak tiha tuir kada kandidatura ne'ebé maka konkore ba eleisaun.
2. Karimbu tiha, konta tiha no konfere tiha votu branku sira, rezultadu sira ne'e tenke anota kedas iha ata rezultadu sentru votasaun no boletin sira sei hatama hamutuk iha envelope ne'ebé identifikadu nudár "votu branku" nian.
3. Karimbu tiha, konta tiha no konfere tiha votu nulu sira, karik iha, rezultadu husi ida ne'e sei anota tiha iha ata rezultadu sentru votasaun nian no boletin sira sei hatama hamutuk iha envelope ne'ebé identifikadu nudár "votu nulu" nian.
4. Karimbu tiha, konta tiha no konfere tiha votu reklamadu sira, karik iha, rezultadu husi ida ne'e sei anota tiha iha ata rezultadu sentru votasaun nian no boletin sira sei hatama hamutuk iha envelope ne'ebé identifikadu nudár "votu reklamadu" nian.
5. Karimbu tiha, konta tiha no konfere tiha votu rejeitadu sira, karik iha, rezultadu husi ida ne'e sei anota tiha iha ata rezultadu sentru votasaun nian no boletin sira sei hatama hamutuk iha envelope ne'ebé identifikadu nudár "votu rejeitadu" nian.
6. Karimbu tiha, konta tiha no konfere tiha votu kanseladu sira, karik iha, rezultadu husi ida ne'e sei anota tiha iha ata rezultadu sentru votasaun nian no boletin sira sei hatama hamutuk iha envelope ne'ebé identifikadu nudár "votu kanseladu" nian.
7. Karimbu tiha, konta tiha no konfere tiha votu abandonadu sira, karik iha, rezultadu husi ida ne'e sei anota tiha iha ata rezultadu sentru votasaun nian no boletin sira sei hatama hamutuk iha envelope ne'ebé identifikadu nudár "votu abandonadu" nian.
8. Karimbu tiha, konta tiha no konfere tiha boletin votu La Uza sira, rezultadu ho número serie sei anota tiha iha ata rezultadu sentru votasaun nian no boletin sira sei hatama hamutuk iha envelope ne'ebé identifikadu nudár "votu La Uza" nian.
9. Envelope sira tenke taka metin no tenke diskrimina kedas número boletin votu ne'ebé maka konten sentru votasaun ida-idak no estasaun votu ho kedas sira ida-idak nia kódigu korespondente no temi mós unidade jeográfika ne'ebé maka sira pertense bá.
10. Iha ata mós sei tau hotu número selu seguransa kada urna nian, fatin no kódigu kada estasaun votu, oráriu loke no taka sentru votasaun, ofisiál eleitorál no fiskais kandidatura sira nia naran, nomos protestu no reklamasau n ne'ebé apresenta no Deliberasaun ne'ebé foti.
11. Konta tiha formuláriu no reklamasau n ne'ebé apresenta, karik eziste, numeru reklamasau sira ne'e tenke anota tiha iha ata rezultadu sentru votasaun nian.
12. Ata Operasaun kontajen no apuramentu rezultadu ne'ebé hala'o iha estranjeiru, nune'e mós ho votu hirak ne'ebé reklamadu, sei entrega, iha suporte fíziku, iha assembleia apuramentu nasional, iha prazu máximu oras hitunulu-resin-rua nia laran, konta husi momentu ne'ebé maka operasaun kontajen no apuramentu rezultadu eleisaun nian remata.

Artigu 52.º

Enseramentu operasaun iha sentru votasaun

1. Anota iha ata operasaun eleitorál, rezultadu kontajen, presidente sentru votasaun no sekretáriu husi estasaun votu sira obrigatoriamente tenke asina ata ne'e.
2. Ba kada sentru votasaun, so admite de'it fiskal ida-ida representa kada kandidatura atu asina ata Operasaun eleitorál.
3. Ba efeito numeru anterior nian, karik fiskais kandidatura nain ida ka liu maka la asina ata Operasaun eleitorál, ida ne'e sei la signifika katak ata no operasaun eleitorál ne'e la vale.
4. Sei hatama ba urna no lé ho lian makás, número votu ne'ebé tau iha envelope sira tuir mai ne'e:
 - a. Envelope "votu válidu", "votu núlu", "votu branku", "votu reklamadu", "votu rejeitadu", "boletin votu la uza", "buletin votu kanseladu" no "boletin votu abandonadu";
 - b. Envelope ida ba ata Operasaun eleitorál, deklarasaun komporimisu, lista prezensa husi ofisiál eleitorál, folla observasaun, lista eleitor sira, lista adisionál eleitor no lista eleitor ein servisu;
 - c. Selus sira ne'ebé la uza no karimbu sira.
5. Urna sira, depois de hatama tiha material ba laran, sei tau tiha selu no nudár responsabilidade presidente sentru votasaun nian, no kompete ba garante nia remessa ba servisu sentral STAE nian.
6. Estratu husi ata rezultadu iha sentru votasaun, ho indikasaun rezultadu apuramentu inisiál, sei asina husi presidente sentru votasaun nian no sei taka iha fatin ne'ebé fasil atu haree iha edifísiu ne'ebé sentru votasaun funsiona bá.
7. Kabe ba presidente sentru votasaun atu garante katak kada fiskais kandidatura ne'ebé presente no kredensiadu hodi ejerse sira nia funsaun iha sentru votasaun ne'e, bele hetan asesu ba kópia ida husi ata rezultadu sentru votasaun nian.

KAPÍTULO V

OPERASAUN APURAMENTO MUNICIPAL HUSI RESULTADU SIRA NO MÓS APURAMENTU HUSI REJIAUN ADMINISTRATIVA ESPECIAL DE OE-CUSSE AMBENO

Artigu 53.º

Assembleia Apuramentu Munisipál

1. Assembleia apuramentu munisipál no apuramentu iha Rejiaun Administrativa Especial Oe-Cusse Ambenu, ne'ebé nia kompozisaun define tuir Artigu 47.º n.º 1, husi lei Eleitorál ba Palamentu Nasional, Lei Eleitorál ba Parlamento Nasional, hahú nia servisu kuandu simu ona ata pelu menus lima husi sentru votasaun korespondente.

2. Kuandu konstitui ona assembleia apuramentu munisipál, bele komesa simu dadaun ona urna husi área ba efeitu destinadu no dezignadu husi 'área resepsaun' ne'e rasik.
3. Iha área resepsaun, presidente sei lé número selus sira ho lian-makás no tuir kedas ho loke urna, ida pur ida, no tuir mai, membru husi assembleia apuramentu munisipál no husi Rejiaun Administrativa Espesiál Oe-Cusse Ambenu, ne'ebé organizadu duni ba ida ne'e, sei konfirma urna sira ne'e nia konteudu uza modelu formuláriu ne'ebé dezignadu husi Termu entrega urna ninian..
4. Karik konfirma katak material hotu-hotu iha urna nia laran, presidente sentru votasaun ne'ebé korespondente ba urna ne'e entrega ba Diretór STAE Munisipál nian ka Diretór STAE iha Oe-cusse Ambenu, conforme kazu, asina "Termu entrega urna" no sei entrega kópia ida husi termu ne'e ba presidente sentru votasaun mos.
5. Karik verifika katak material balun laiha urna nia laran ida, presidente sentru votasaun korespondente tenke justifika ho eskritu, iha parte ida ne'ebé destinada ba observasaun konstante husi Termu de Entrega Urna nian, saida maka sai nudár motivu ba falta ida ne'ebé verifika ne'e no asina Termu Entrega ne'e.
6. Iha kazu ne'ebé maka refere iha número anterior, Diretór STAE Munisipál ka Diretór STAE Rejiaun Administrativa Espesiál Oe-Cusse Ambenu sei anota iha "termu entrega urna" katak nia hatene kona ba falta ne'ebé maka verifika ne'e, tuir mai asina termu korespondente no entrega kopia ida ba presidente sentru votasaun no rejista tiha falta ne'e iha ata operasaun assembleia apuramentu minisipal ou apuramentu iha Rejiaun Administrativa Espesiál Oe-Cusse nian hodi bele lori ba koñesimentu no desizaun assembleia apuramentu nasional nian.
7. Tuir mai sei hasai husi urna, ata orijinal Operasaun eleitorál, envelope ida ne'ebé iha nia laran, tau votu reklamadu nomos envelope ida ne'ebé tau votu núlu sira, karik iha.
8. Hotu tiha, sei halo fotokopia ida husi ata Operasaun eleitorál nian iha Sentru Votasaun ne'ebé kontein rezultadu no koloka tiha kopia refere ba urna estasaun votu nian laran.
9. Hafoin anuncia iha número sira iha leten/anterior, sei hasai tiha karimbu hot-hotu no sei tau iha urna ketak ida para tuir mai, sei entrega fila-fali ba STAE.
10. Iha urna sentru votasaun nia laran, iha envelope ida ne'ebé tau boletin husi votu válidu sira, envelope ida fali tau boletin votu sira ne'ebé la uza, envelope ida ba boletin votu kanseladu nian, envelope ida ba boletin votu branku, envelope ida ba fotokópia folla rezultadu husi ata husi Sentru Votasaun.
11. Tuir mai, assembleia apuramentu munisipál ka assembleia apuramentu Rejiaun Administrativa Oe-Cusse Ambenu, sei hahú halo rekonsiliaun ba ata hotu-hotu husi sentru votasaun liu husi soma husi total ne'ebé indika iha ata Operasaun eleitorál husi sentru votasaun ida ne'e nian.
12. Rekonsiliaun ata ne'ebé mai husi sentru votasaun ba iha assembleia munisipál ka ba assembleia apuramentu iha Rejiaun Administrativa Espesiál Oe-Cusse Ambenu, halo iha forma ida la ho interupsaun to'ó konklui prosesu hotu apuramentu munisipál nian ka assembleia apuramentu iha Rejiaun Administrativa Espesiál Oe-Cusse Ambenu, conforme kazu.

13. Dadus hotu-hotu husi kada ata Operasaun eleitorál sei introduz hotu ba modelu sistema apuramentu elektróniku husi rezultadu eleitorál, ida ne'ebé STAE maka prepara, konforme modelu konstante iha aneksu IV regulamentu ida ne'e.
14. Remata tiha rekonsilasaun ba ata sentru votasaun sira husi Munisipiu ida-idak ka Rejiaun Administrativa Espesiál Oe-Cusse Ambenu, sei print/impresa ata apuramentu munisipál ka apuramentu husi Rejiaun Administrativa Espesiál Oe-Cusse Ambenu ne'ebé sei asina husi membru assembleia apuramentu husi fiskais partidu polítiku ka koligasaun partidaria sira nebe maka marka prezensa.
15. Asinatura husi fiskal kandidatura ida ba ata ne'ebé maka temi iha numeru ida liu ba, só obrigatooriu kuandu fiskal ne'e apresenta reklamasau ruma.
16. Sei taka kopia ida husi ata ne'ebé temi iha artigu ida ne'e iha edifísiu ne'ebé maka assembleia apuramentu munisipál ka apuramentu husi Rejiaun Administrativa Espesiál Oe-Cusse Ambenu hala'o nia servisu bá, sei entrega mós ezemplar ida ba fiskais partidu polítiku ka koligasaun partidaria sira ne'ebé maka asina tiha ata ne'e no ezemplar ida sei fó ba servisu sentral STAE nian.
17. Halo hotu tiha Operasaun hotu-hotu husi apuramentu munisipál ka apuramentu halo iha Rejiaun Administrativa Espesiál Oe-Cusse Ambenu, tau hamutuk tiha ata hotu-hotu husi apuramentu inisial operasaun eleitorál sentru votasaun nian, ata apuramentu munisipál ka apuramentu halo iha Rejiaun Administrativa Espesiál Oe-Cusse Ambenu, envelope husi votu reklamadu no votu nulu, karik iha, no reklamasau sira hodi koloka hamutuk iha urna ida para tuir mai hatama ba CNE iha Dili.
18. Operasaun servisu apuramentu munisipál no mós apuramentu iha Rejiaun Administrativa Espesiál Oe-Cusse Ambenu realiza iha prazu másimu loron-rua.
19. Fiskais partidu polítiku sira, fiskais koligasaun partidaria sira, observadór no profesionál órgaun komunikasaun sosial ne'ebé akredita husi STAE nian bele marka prezensa iha faze hotu-hotu iha prosesu tomak apuramentu munisipál no mós iha apuramentu Rejiaun Administrativa Espesiál Oe-Cusse Ambenu.
20. Polisia maka sei garante seguransa ba sede apuramentu munisipál no mós sede apuramentu Rejiaun Administrativa Espesiál Oe-Cusse Ambenu nian tuir lei ne'ebé vigora no tuir mós diploma ida ne'e nian.
21. Modelu ata rezultadu ba munisipiu no Rejiaun Administrativa Espesiál Oe-Cusse Ambenu inklui ona iha aneksu V husi Dekretu ne'e, ne'ebé forma hanesan parte integradu ida.

KAPÍTULU VI

OPERASAUN APURAMENTU NASIONAL

Artigu 54.º

Assembleia de apuramento nacional

1. Iha prazu másimu oras hitunulu-resin-rua depois de simu tiha ata de apuramentu Rejiaun Administrativa Espesiál Oe-Cusse Ambenu, apuramentu munisipál no apuramentu iha estranjeiru, CNE sei hahú halo apuramentu nasional, konfere tiha ata

sira ne'e no deside, definitivamente, kona ba votu reklamadus, karik eziste, no kona mós ba reklamasaun hotu-hotu ne'ebé maka apresenta

2. Verifikasaun ba ata apuramentu ne'ebé temi iha número anterior, inklui mós possibilidade atu apresia no desidi ho maneira ida fundamentu, kona ba kualkér inkonsistensia ka erru matemátika ruma ne'ebé verifika
3. Sempre kuandu verifika retifikasaun ruma ba ata de operasaun de apuramentu iha Rejiaun Administrativa Espesiál Oe-Cusse Ambeno, apuramentu munispál no apuramentu iha estranjeiru, tanba mótvu sira no termu ne'ebé prevé iha número anterior, sei print-sai fali ezemplar foun husi ata refere, ne'ebé sei temi hotu retifikasaun sira no fundamentu korespondente sira no sei tau hamutuk ho ata retifikada
4. Konklui tiha Operasaun no, iha prazu ne'ebé maka refere iha número 1 husi artigu ida ne'e, CNE sei elabora no taka iha nia sede ata rezultadu apuramentu nasional provizóriu nian
5. Sei haruka kópia sira husi ata rezultadu apuramentu nasional provizóriu ba STAE no ba mós órgaun informasaun nasional sira.

Artigu 55.º

Rekursu

1. Kona ba rekursu ba apuramentu provizóriu rezultadu nasional ne'ebé CNE publika, bele apresenta iha prazu oras hatnulu-resin ualu nia laran, konta husi afixasaun ata ne'ebé temi iha n.º 4, husi artigu anterior nian, ba koletivu STJ, ne'ebé sei notifika kedas interesadu sira no deside mós iha prazu hanesan
2. Termina tiha prazu hodi halo rekursu nian maka laiha rekursu ruma apresenta, CNE sei hatama ba STJ ata apuramentu rezultadu nasional nian, akompaña mós ho ata apuramentu iha Rejiaun Administrativa Espesiál Oe-Cusse Ambeno, apuramentu munispál no apuramentu iha estranjeiru, nomos kualkér dokumentu ne'ebé konsidera nudár importante, no temi kedas iha ne'ebá katak laiha ida maka apresenta rekursu

Artigu 56.º

Proklamasaun rezultadu no validasaun eleisaun

1. STJ, deside tiha rekursu tuir termu nº 1 husi artigu anterior ou prazu remata tiha mas laiha apresentasaun ba rekursu, sei analiza dokumentu sira ne'ebé maka CNE entrega, julga liu husi akórdaun ba validade eleisaun Parlamentu Nasional nian no, liu husi nia presidente, sei proklama rezultadu definitivu iha prazu máximu oras hitunulu-resin-rua nia laran, obrigatoriamente sei anunsia número total eleitor inskritu no votante sira, votu branku no votu núlu, distribuissau mandatu husi lista konkorente sira no determinasaun ba kandidatu eleitu sira husi kada lista
2. STJ nia akórdaun sei hatama hodi publika iha Jornal da Repúblika ho kópia ida ba CNE no ida ba STAE.

Kapítulu VII
Dispozisoins Final no Tranzitooria sira

Artigu 57.º
Reklamasau no protestu

1. Konsidera nudár protestu, atu ruma ne'ebé dirije kontra iregularidade ne'ebé detekta maibé seidauk hetan apresiasau husi órgaun administrasau eleitorál kompetente
2. Konsidera nudár reklamasau, aktu ne'ebé kontesta desizaun ruma ke apresia ezistencia husi iregularidade ruma ne'ebé mosu no hakarak revoga ka subsitui desizaun reklamada.

Artigu 58.º
Apoi u ba prosesu eleitorál

Servisu no organizmu husi administrasau públika tenke fó assistensia ne'ebé presiza ba órgaun administrasau eleitorál sira, iha ámbitu prosesu eleitorál ninian.

Artigu 59.º
Dever sijilu

1. Hotu-hotu ne'ebé maka direta ka indiretamente halo funsau ka akompañia prosesu eleitorál iha sentru votasau no estasaun votu sira ida-idak, sei sujeita ba devér sijilu ligadu ba tratamentu dadus, informasau no dokumentu ne'ebé sira iha koñesimentu ka ne'ebé consege hetan asesu iha ezersísiu sira nia funsau nian.
2. Hotu-hotu ne'ebé maka número anterior ne'e abranje, tenke asina deklarasaun kompormissu ida, ne'ebé sei vinkula sira, antes hahú sira nia funsau.

Artigu 60.º
Destinu Buletin votu no ata Operasau eleitorál

1. Buletin votu no ata Operasau eleitorál sira, iha suporte sura-tahan ka informátiku, STAE maka sei halot, ba tribunal rekursu nia dispozisaun, durante periodu tinan ida nia laran, depois anunsia tiha rezultadu definitivu eleisaun ninian.
2. Prazu ne'ebé temi iha número anterior liu tiha no laiha determinisaun judisiál ruma maka kontrariu fali, STAE sei hahú halo destruisau ba boletin votu sira ne'e, ho esepasau, ba exemplar ida ne'ebé sei entrega, hamutuk ho ata Operasau eleitorál, ba Arkivu Nasional Timor-Leste nian hodi halo arkivu istoriku.

Artigu 61.º
Tribunal Rekursu

Enkuantu supremu tribunal justisa la hahú ninia funsau, kompetensia sira hotu ne'ebé maka atribui ba nia liu husi regulamentu ida ne'e, sei ejerse husi Tribunal Rekursu

Artigu 62.º
Entrada vigor

Dekretu governu ida ne'e, sei tama ba vigor iha loron ida tuir mai depois nia publikasaun iha *Jornal da República*.

Aprovadu iha reuniaun Konsellu Ministrus iha loron 11 fulan Maiu 2017.

Publika.

Primeiru-Ministru,

Dr. Rui Maria de Araújo

Estatal, Ministru Administrasaun Estatal,

Dionísio Babo Soares, PhD

Tradusasaun la-Oficial

ANEXU I

Lista material nesesáriu ba funcionamentu sentru votasaun no estasaun votu sira nian:

1. Urna votsaun no kada selu seguransa ho kedas númeru;
2. Buletin Votu;
3. Tinta indelével;
4. Kabínas votasaun ho númeru sifisiente;
5. Forumuáriu ata Operasaun eleitorál ne'ebé komposta husi dokumentus sira tuir mai ne'e:
6. Folla rezultadu eleitorál;
7. Lista prezensa ofisiál eleitorál;
8. Deklarasaun de Segredu ne'ebé sei asina husi ofisiál eleitorál sira;
9. Livru observaun;
10. Lista eleitor;
11. Lista eleitor adisionais;
12. Lista eleitor ein servisu;
13. Lista aambulante;
14. Formularius rezultadu apuramentu nian hodi bele taka iha fatin públiku sira;
15. Formuláriu termu entrega material;
16. Dístiku ba estasaun votu nian;
17. Follaa avizu atu bele informa ofisiál eleitorál sira nia naran;
18. Ezemplar boletin votu, iha tamañu/ukuran boot;
19. Formuláriu ba reklamasaun no protestu;
20. Distintivus/tanda próprius ba ofisiál eleitorál, fiskais kandidatura no observadór sira;
21. Karimbu ne'ebé dehan "CANCELADO";
22. Karimbu ne'ebé dehan "RECLAMADO";
23. Karimbu ne'ebé dehan "EM BRANCO";
24. Karimbu ne'ebé dehan "NULO";
25. Karimbu ne'ebé dehan "NÃO UTILIZADO";
26. Karimbu ne'ebé dehan "REJEITADO";
27. Karimbu ne'ebé dehan "ABANDONADO";
28. Karimbu ne'ebé dehan "Eleição Presidencial 2017"ou "Eleição Parlamentar 2017", depende ba kazu;

29. Envelope ba boletin votu válidos
30. Envelope ba boletin votu em branco;
31. Envelope ba boletin votu nulus;
32. Envelope ba boletin votu reclamados;
33. Envelope ba boletin votu cancelados;
34. Envelope ba boletin votu não utilizados;
35. Envelope ba boletin votu rejeitados;
36. Envelope ba boletin votu abandonados;
37. Lista kandidatura kompleta ho kandidatu hotu-hotu ba eleisaun prezidensial no suplentes sira;
38. Calculadora;
39. Agrafadores; lapijeiras no pregus no número suficiente;
40. Fita adeziva;
41. Formuláriu ata estasaun votu;
42. Formuláriu de ata rezultadu ba sentru votasaun;
43. Formuláriu ata tabulasaun rekonsiliaun ata;
44. Formuláriu termu entrega urna husi sentru votasaun ba assembleia apuramentu nasional
45. Formuláriu ba reklamasan no protestu;
46. Selus seguransa numerados;
47. Urna ba transporta ata no votu reklamados, karik iha;
48. Envelopes;
49. Relójius;
50. Materias eskritooriu seluk.